

宦蹟

夫官無論崇庠期於盡職境無論險易期於便民士人一行作吏能講求治理夙夜在公俾循聲著於甘棠之國政績傳於父母之邦雖所施未宏亦庶幾乎有猷有爲矣茲於阜平得仕者數人蓋所謂能其官者也詳書之待採風者之擇焉

高第順治二年由拔貢授陝西鞏昌府理刑推官時陝右初定訟牒紛紜第剖決如流民情帖然三年大兵入川勦賊奉檄開秦州至漢中棧道七百里親裹糧入山懸立賞示勸慰交至夫役踴躍一月而工竣復造三

百餘舟資挽運軍糧賴以無悞屢著勞績以疊薦陞河南彰德府同知踏勘西華荒田詳免五千餘頃百姓感之立碑頌德家居亦多善蹟如稟請免水衝荒地創修王快堡牆捐青竿嶺山莊爲兵營至今利賴焉

袁履恕字松巖晚年自號在公原籍山西高平縣祖宏功始遷居阜平南關外履恕儁朗有才識練達時務每以縣廢爲憂難達

上聞幸康熙二十二年

聖祖仁皇帝西巡五臺履恕與合邑紳民叩請復縣

上詔許之四十一年二月

聖祖仁皇帝巡幸五臺

駐蹕履恕家

賜克食四十九年復因

巡山往返再

幸其家

賜克食帑金及防虎鎗五十二年四月

世宗憲皇帝以親藩代禮五臺仍

旋蹕於其家

賜額曰玉樹堂聯曰山居良可愛俗客到應稀并克食餽
餽時果數種是日值宏功夫婦誕日履恕因謝

恩奏及之復

賜額曰古稀齊眉金珠連環萬字貢段一聯櫻桃折魯魚

太平春酒

命闔家與太平宴韋布儒生得數瞻

雲日

天章御饌

寵賜優渥士林榮之由歲貢選授東安縣訓導雍正六年遵

改補例轉山西陽曲縣丞時秦雍不靖履恕仍未彌月

旋奉檄往西陲運糧械五年之間於役十三計程九萬

餘里佳節令辰風霜雨雪俱度於征鞍驛舍先後期會

無違者事竣復檄察榆次縣逋欠時前任兩令均被劾待質在任者亦搖而丁糧侵隱之實乃由年頭社長與胥役朋結奸欺飛灑詭寄履恕微服密訪具得其情乃取尤猾者械治之皆承服厯年積弊洗豁一清三縣令皆得釋大府才之並錄其前勞假澤州府陽城知縣縣與高平接壤懇請府守得還故里上先塚封樹刊碑焉數月擢陽曲縣知縣剔弊釐奸吏民懷畏以縣居衝要政務殷繁身積勞衰憊慮貽誤乃乞休旋里時乾隆元年也五年阜令施毓暉詳請爲鄉飲大賓八年正定府舉行鄉飲謀大賓太守王德楷曰齒尊德劭無踰袁陽

曲者矣當時名卿鉅公聞其夙德多遙相推重十五年
高宗純皇帝幸五臺履恕率子孫匍匐迎謁

上溫慰之

賜飄帶荷包卒年八十七歲生五子其長本濂

王元亮字揆百號希陶父政見舊德志元亮其仲子也
少勗學工楷書年二十六擢拔萃科

廷試二等肄業國子監恭逢

高宗純皇帝臨雍講學元亮隨例獻詩賦

上嘉之賜黃絹庫銀歲滿咨部以教諭候選復充四庫館謄
錄功竣敘教諭授平谷旋調慶雲所至輒誘掖宏獎以

整飭學校爲己任諸生貧者或資以膏火士愛敬之總督顏聞之以品端行潔學富才明署上考嘉慶癸酉選授陝西漢中府洋縣知縣除秕政省徒役詞訟速於訊決禁革株連好培育士林邑民以生佛目之是年九月岐山縣教匪萬五合賊首吳奇等倡亂陷岐山五郎郿縣蔓延終南塾屋褒城寶雞之間關西大震陝甘楊提督漢中鎮吳總兵督軍分捕賊奔潰舊巢由城古竄洋縣元亮募勇丁數百分隘防禦掘城濠製器械朝夕申明紀律並諭以臣民當效死報

國之義至慷慨流涕間五日一勞士士皆感奮十二月三

日賊數千至城東八里關肆行焚畧居民望城逃竄元亮與守備馳往堵禦命擇逃民之壯者人給竹矛處城外餘皆入城發倉米飢之或執官倉不可擅動元亮曰活千萬人之命而一人獲罪所得多矣已而賊佯退初六日復至見守禦嚴整仍退入舊巢是時吳總兵督軍援洋迹賊追勦陝安道檄元亮籌備兵饗探營餽餉元亮在處飛輓程數十里至四五百里間關轉輸無少失悞亂之始作也洋密邇賊巢被竄擾者三大軍數過一切防守支應之費其數不資而其餽餉行營於例有夫役之外有偵探有督催有獲送勇丁及倉穀用以拯逃

民者元亮銳意爲之畧不爲後計有代慮其累者元亮
慨然曰是奚足慮昔吾父疾革時目諸子孫而囑曰吾
數十年撙節積累薄增田產非欲汝曹以高貲雄鄉里
也汝曹能周急濟貧或登士版爲

國計民艱耗之是遺汝曹以忠義吾無憾今變生疆場誠
使於

國家有絲毫補益卽鬻產佐公吾父當含笑九原又奚慮
聞者愧服甲戌正月六日賊由太白山至柳家河縱橫
繹騷元亮揣其將濟江入蜀也卽飛騎稟知各營并四
川督帥越四日果奪渭門浮漢入川成都將軍賽得元

亮警報急督兵扼險賊不虞官軍猝至欲回竄吳總兵復自後拊其背兩軍夾庠盡殲之人咸謂軍得有功者由元亮聞之先事也是役也自癸酉九月至次年二月戎馬蒼黃一日數變元亮外應軍餉內籌戰守具方事棘時日營心晝寢食俱廢積勞成疾幾不起因再三請解官大府重之但遣員護理而核筭軍需不如例者至五千餘金道府及寅好醵貲助之猶未半也元亮命子仁馳歸鬻產以足之大吏上其勞議敘加一級疾瘥調延長縣士民焚香餞送由郊至雞頭關皆攀轅悲戀如去慈父乙亥冬復以疾乞休歸後野服蕭然不問家人

生產年八十目見曾元猶鬢髮出入不扶杖一夕無疾而終殮時色如生云

耿麟字瑞符號雲亭邑東魏家峪村人自幼孝友性成九歲遭生母彭氏喪蹣跚號泣人不忍聞稍長事繼母任氏郅氏皆以孝稱家貧好學卽耕樵亦必攜卷往由庠生中嘉慶戊寅科舉人己卯科進士以知縣分發湖北歷任漢川江陵漢陽等縣知縣多有政蹟其初歷江陵也適值水災麟立刻前往勘驗人皆以沿江泥淞難行請稍緩麟曰數萬生靈困於塗泥爲之宰者敢安居乎竹笠草履而出涉水步行靡不親歷其境賑濟貧窮

無不周至後復革除私弊十餘條交卸日紳民流泣相送爲立生祠漢陽有趙魁者巨盜也橫行江漢間吏不能捕麟以德化之趙魁因投案請死麟收爲捕役擒獲盜賊無遺類地方得以安靜嗣升隨州知州丁父艱回籍服闋部選雲南路南州知州升普洱府威遠同知其地與景東接壤景東人强悍累占威遠地畝人莫能爭有謠云牛耕田馬食穀我買田產人作主幾時撥霧見青天一照羣冤不白苦麟至任廉得其情平反七十餘案一境歡然曰今日撥霧見青天矣至任滿無宿案獄無罪囚者三年旋升順甯府知府卒於官其善政頗多

茲擇其尤者紀之

陳鳳圖號樸亭父琪以行誼著鄉里長老見鳳圖蚤慧咸曰嘗聞有陰德者必食其報琪之報其在此子乎而琪訓敕鳳圖甚嚴經學詞章督課無少貰故鳳圖未弱冠卽有聲庠序嘉慶癸酉成選貢戊寅舉京兆留邸待禮闈試一夕夢父色若不豫者星馳歸省父見怒曰若無志進取耶促次日行癸未成進士授河南彰德府內黃縣知縣先是漳河決三台沒村聚二十四十餘年猶陸沈也鳳圖督民穿渠引豬水入漳民始復業丙戌歲大旱復教民開渠灌田高者以桔槔引之多所全濟河

北每遇歲歉奸民輒煽衆畧奪富家倉粟名曰均糧是歲邑有匪百餘持械橫鄉里鳳圖聞之率一僕一役馳往都司請以兵從不許至則剗切鐫諭怵以利害衆皆環跪垂泣鳳圖取爲渠者十三人繫以歸餘悉慰遣之其時鄰邑遇是變者以兵民格拒致戕傷官弁皆罷吏議而內黃宴然史玉堂者邑大猾也樹羽黨爲民害屢拒捕會縣試未竣夜大風鳳圖率健役疾馳四十里抵其巢擒之并其黨二人諭餘黨閉門者不問皆閉門以三人歸置之法豪強由是屏息邑民德之爲繪繁陽治蹟圖咏歌其事道光丁亥遭父喪服除改廣東厯任普

甯揭陽新會諸縣所至民皆便之甲午卒於官年四十
三鳳圖天資孝友少喪母哀毀幾滅性家貧授徒養親
已甘疏淡奉親必豐備琪性愷悌喜施往往取所進者
轉給貧乏悉祇承之無敢違其宰內黃也事皆鞠臆稟
命若受書家塾時扶父柩旋里徒步匍匐哀感行路及
之官輿東父之衣履手澤皆謹緘行篋每展閱輒對之
流涕有女弟三適人之後資給各數千金至己之貲產
初不措意有訝其重女弟而視子孫輕者鳳圖曰吾同
產止四人親所鍾愛也何忍聽其失所若吾之後使爲
清白吏子孫則所遺不旣厚乎

論曰觀元亮述其父臨沒之言慷慨激烈大義炳如
遂能履艱險之境奮不顧家卒完城守其忠孝大節
有過人者未膺顯擢遽以疾罷惜哉其數人殫心奉
公才皆足以濟之而鳳圖之篤行尤庶幾古之遺孝
也詩曰彼其之子邦之彥兮